

清·方略館 編

清代 方略 全書

北京圖書館出版社



清代方略全書

九八

清·方略館編

北京圖書館出版社

清·曹振鏞等撰

欽定平定回疆剿擒逆裔方略

卷二四——三四

清道光刻本

欽定平定回疆勦擒逆裔方略卷之二十四

道光六年秋九月己卯朔

山海關副都統福克精阿疏奏黑龍江頭起官

兵於八月二十六日進關

庚辰

賞資派赴軍營之副都統安福阿勒罕保及總管副
總管協領佐領防禦驍騎校等官銀兩有差續

調吉林黑龍江帶兵官員一律頒給

賞帶兵之墨爾根城副都統多隆武大卷八絲緞一

疋小卷五絲緞一件

辛巳

備辦各路官兵軍裝火藥

署理陝甘總督鄂山奏言叅贊楊遇春前調官

兵五千五百名業經陸續出關前進楊遇春亦

卽於十六日出關其派往哈密駐劄之滿漢官
兵二千名寧夏將軍格布舍統領於八月初四
日起程又楊遇春二次續調進征官兵一萬一
百名內有甘省兵四千一百名陸續進發西安
滿洲營官兵一千名於八月十五日分起起程
西安鎮綠營官兵五百名卽於二十三日接續
前進武隆阿帶領京營勁旅及所調山東官兵

隨後亦將踵至以上各起官兵所需車馬供應
分別雇備經過橋梁道路飭令修築並選派文
武大員分段照料以期迅速進行計節次調兵
三萬餘員名需用軍火器械尤關緊要除各官
兵由原營照例配帶暨楊遇春前調火藥鉛丸
火繩戰箭業經照數撥運外茲據楊遇春咨稱
合計現在兵數尙需戰箭八十萬枝火繩一百

九十五萬丈火藥四十三萬斤槍子六百五十萬出礮子一十二萬出鐵馬掌四萬副戰弓三千張當卽飭局分別趕運製辦茲復恭錄

諭旨諄飭該營等務各如法配製運交肅州總局查

收轉運仍令肅州鎮總兵劉瑞就近覈實查驗

其一應馱載事宜惟有詳慎籌辦隨時趕運接

濟盧坤不日卽可到甘臣再與商榷另行具奏

奏入

上批諭曰諸凡與盧坤妥商辦理一切軍需斷不許稍有遲誤更不可稍有推諉之意勉之又勉無負委任

和闐失守

申諭防守東四城

阿克蘇辦事大臣長清奏言

臣

達凌阿於初七

日帶領馬步官兵六百八十餘員名行抵阿克
蘇會同防剿查逆回前經伊犁總管額爾古倫
帶領錫伯等營官兵於七月二十七日在渾巴
什河擊退之後竄回葉爾羌地方其附近零星
從逆賊匪經差派官兵協同伊薩克愛孜斯先
後搜獲一百餘名訊係阿克蘇所屬情蘭等莊
回子被張格爾差來阿渾二名勾結附逆除應

行留質二十一名外餘俱於訊明後正法梟示
嗣於十一日據哨探兵丁報稱距城一百二十
里之洋阿里克地方有賊屯聚多寡未能詳悉
臣等因不知虛實兵力較單遽難進剿俟差探
確實再行相機辦理惟該處逼近渾巴什河其
沿河一帶最關緊要前雖派有錫伯索倫等營
及各處換防官兵共一千三百餘員名分布防

堵但沿河縣亘一百數十里之遙現在躡淺可
渡之處甚多必須加兵防守當會同商酌添派
伊犁領隊大臣碩隆武帶領伊犁滿洲兵五百
名烏魯木齊滿漢官兵四百名前往分段守禦
覈計現到阿克蘇官兵除派往防河及撥赴烏
什防堵並守護札木軍臺不計外只存烏魯木
齊滿漢官兵一千二百餘員名伊犁滿洲兵五

百名喀喇沙爾辦事大臣巴哈布帶到土爾扈特兵一千名此時喀什噶爾及葉爾羌地方附近回匪甚衆兵力較單似難深入

臣

等面爲籌

計惟有分派兵丁各處哨探如附近賊匪祇數

千人

臣

達凌阿應卽帶領官兵親往迎頭剿洗

儻賊勢較衆卽於沿河一帶往來策應俟大兵雲集分路痛加剿洗以肅邊境再初八日有自

和闐逃回兵丁王相泰報稱十五日有賊匪千
餘先入回城十六日賊同和闐回子合夥約有
二千餘名攻城官兵民人祇二百有餘極力抵
禦十八日所屬六城回子全行從逆齊來攻撲
二十日通事來城索放該阿奇木出城未許阿
奇木亦勸令速退乃揚言阿奇木曾約謀逆何
以不反卽吹角圍城被陷軍民率皆死於溝壑

達凌阿又奏言此次帶領烏魯木齊滿漢官兵
四千名軍火馬匹糧料均係自雇車駝載運口
糧按城支領水草隨地購買並無騷擾情弊至
現在情形惟有保護阿克蘇烏什庫車三城並
阿克蘇迤東臺站以現有之兵暫爲分布要隘
嚴密防範臣仍於適中之地駐劄探知何處緊
急卽往策應訪知附近零匪隨時派兵搜拏以

待大兵趕到再議進剿均奏入

上命軍機大臣傳諭長清達凌阿巴哈布慶廉果良
額祥雲保多貴曰阿克蘇渾巴什河一帶賊匪前
經額爾古倫擊敗竄回現復探明洋阿里克又有
賊匪屯聚自係該逆等隨處勾結復來窺伺該處
沿河一帶及各要隘地方必須分布周密加意防
堵現在阿克蘇已到各路官兵及各處換防兵弁

據奏除分派各處外存城兵祇一千七百餘員名
前已有旨飭催甘州帶兵副將胡超等督兵速赴
該城聽候調遣自可剋期趕到達凌阿當偵探賊
蹤應勦則帶兵迎擊如覺兵力尙單不能制勝則
幫同長清嚴密防守慎勿輕敵窮追致墮賊人奸
計是爲至要巴哈布所帶土爾扈特兵一千名前
經降旨令其旋回各防本境此時旣已趕到如遵